

Buna sira, buna sira me cari siuri! E ben, c'me c'la vâ?

No! Avei nent pourea! A son nenta chi per fev in ater cumisi! I n'ej sa sentì toncc ant'isti ultim temp! An Piasa Ratas, an Piasêta d'la Lega, au Teater Comünal, a la television e an toncc ater post che a scumët che ades i n'ei a basta.

Noi a ringrasiuma el Cumisari per cul c'la facc e ades u Sendich aj l'uma; onsi, per la pruma vota ant'la storia ad Lisondria a j'uma na Sendichessa! (Us disli acsej?). Uarda te, is doni, i riesu propi a anfiles dapertüt! Va ben, noi aj fuma toncc auguri e a stuma a vighi se cui suced. In atr'ani po.....

Ist'ani per la businà u j'è na nuvità. Adès a v'la cönt.

Sta prüma u Signur l'ausì ciamè ansema a lü anche Buca, che per toncc ani l'ava facc Mafé, e quondi ca l'è rivà an Paradis a l'è vist Arnoldi e Celeren, che per toncc ani j'avu facc Gelindo e Binasco c'l'ava facc Mafé. J'eru lé chi ciaciaravu ansema a Gajoud an lisondren e l'è sentì che j'aurivu fè Gelindo an Paradis perchè cui chi capisu u lisondren i son pü toncc.... da là che acsi chi! Ma lü uj fà: "Ma no, lasumljla fè a lur, ant'u Teater di Frà, andonda che tucc ansema a l'uma facc per 69 ani senza interusion.

Se, cui ch'il fon ades i son nenta c'mè noi, ma tut'ansema is la roncu listêsa. Ad ogni modo a l'è mej ch'ai mondu cuce ispirasion, cuch'idea".

E anlura j'on diee a Gajoud: "Te che t'ej an cunfidensa con u to amis Locardi (onche is a l'è cêcch!), mondji a di cuc cosa, ch'el posa dej na mon!"

"Se, cul'ater là, - u dis Gajoud - che quondi c'l'è dambsojn per Carvè um romp semper....el scatulì, perchè ogni tont ai taca c'mè ai frà ad nocc e pò, quondi c'l'è utnì tut cul c'l'auriva u sà gnonca pü sa son al mond... us fà per di!"

Ad ogni modo a la fen is son bütà d'acordi e a la fen i m'on mandà in fax!! Se, a l'ho trovà ant la stala antont c'andava a dem in crep ant'el pajon.

U j'era scricc che d'an po' ad temp a sta part anche an Paradis u j'è cuc prublema. Se perchè anche lè, specialment j'ultim rivà, i voru fè cariera e anlura i fon i santerellini con u Signur e po, per fè di poncc, i von a büfej ant'el j'urigi tut cul chi vigu an gir... e anche cul chi vigu nenta.

L'ultima vota i son andacc a dì au Signur che S.Peder u scoudava el Paradis col calor c'l'avniva sü da l'Infern. U Signur anlura u l'ha sübit facc ciamè col mandato ad garansia e quondi ca l'è rivà au so cospetto u j'ha ciamà se la tangent u la piava dai diavu d'l'infern o da cui chi rifurnivu el gasolio.

I present i stavu tucc col fià suspeis e Son Peder l'ha subit negà tüt e l'ha giurà che lü l'ha mai pià in sold nè dai diavu d'l'infern nè da cui chi vendu el gasolio. "Me, s'a fijsa in disonest -uj fà- anveci ad fè el purtié andava a fè magari u Diretur General del Ministero d'la Sanità. Me a son inucent e cul c'a j'o dicc a l'è verità. Parola di Pietro."

Oh, tücc i present sentenda dì da Peder "PAROLA ... DI PIETRO" j'on pensa ben ad fè... la marcia indietro.

A pruposit ad sanità, in me amis cu stà an si bric u m'ha cüntà che au so pais i son andacc veja quasi tucc. U j'è armast anmache di vegg e anlura poc per vota j'on sarà l'ufisi postal, l'è andacc veja anche el farmacista e u dutur el va dal paruc e uj dis: "Siur Prevost, chi u j'è pü gnente da fè e me a pos pü vivi. Am n'a vag anche me!" El previ, tut disperà el va an Cesa, u s'ansnongia davonti au Signur e uj fà: "Signur dem na mon! S'el va veja anche u dutur c'mè ca fasa me, acsi chi da bele sul?" E u Signur uj rispond sübit: "Preoccupi nenta che aj pens me".

La mateina dop l'ambulatori a l'è druert regularment e u j'è sa an po' ad gent c'la specia. Uj riva in bel omi, con la barba e i cavì an po' long, ma distinto e el fà entrè el prüm, ca l'è in omi an s' la carusèta. Apena entrà el fà per dì cuc cosa e l'ater, con u so scusà bionc uj dis: "Alzati e cammina!" Cul an s'la carusèta l'arman an po' lè e po u leva sü, el peja la so carusèta e el va. Cui chi spiciavu ad fora, aughendli sorti is fon anturn e ij ciamu: "Dì, c'm'è c'l'è is dutur nov?" E lu: "Uhm! Sti dutur d'la mutua.. tucc medesim: u m'ha gnonca visità!!"

Eh! L'è nent che chi da noi u sa staga tontu ben, neh! Tont per c'mensè j'on facc sparì tucc i vespasion e acsè, con sta frigg, cui ch'jon guadagnà i son cui chi vendu i pannoloni. Oh! uj n'a vè pu toncc che cui da masnà. E se uv capita ad vighi doi an po' ansion ch'is parlu ansema pistonda i pé e strensenda el gombi, l'è nent perchè ch'jon presia! A l'è per cuc cosa d'ater.

Però si parlu ad so fiò o ad so fia i resistu, neh!  
Se, a l'è cula gent che da na parola an sü i nominu semper so fiò o so fia. Ancura ieri a j'o ancuntrà in amis ca l'era da vent'ani ca l'ava vist.  
Dop i solit cunvenevul u m'ha sübit dicc che lü l'ha in fiò che oltre a esi bel e grond, l'è onche simpatic e suvratüt antelgent.  
Fina i so culega ad lavù i disu che me fiò a l'è in fenomeno che an gir us

na vigh pochi e ist per in papà a l'è na gron sudisfasion....

“Meja tucc i poru vantes d'avei in fiò bel e antelgent c'me me fiò. Ah.. che fiò, me fiò... che fiò, me fiò.

Va ben, aj fag, to fiò, to fiò, to fiò... dim almenu se ch'el fà... Me fiò?

Um rispond - el fà l'operatore.

U travaja coi computer? - Ai digh me.

No, con la ramasa! Um rispond. - Ah, ma c'me cu ramasa lü! - I l'on fûna ciamà operatore ecologico!”

Au long el strà u j'è pü bogi che an s'la lëina! E i fanciuten dau di d'ancò i son pü abituà a fè la sghiarola c'mè ca favu noi na vota, e ij cascu andrenta. In nonu l'era andacc a piè so anvud a scola: u l'a lasà andè in mument per sufies u nas e quasi quasi ul trovava pü! A l'era cascà ant'in bogg d'la strà.

E u sutpasagi d'l'uspidal? A forsa ad scavè i son rivà a na surgent d'acqua mineral! El machinetti cu j'è ant'i curidur fon pü gnente! I malavi i mondu i so parent a pien di sidel perchè dis c'l'è pü bouna che cula del butigli e la custa gnente!

La piscina anveci dis chi la spostu lè an t'u sutpasagi d'la feruvia d'la Ventuleina, per andè a Son Giulion. Ah lè l'acqua la moncherà nenta ad sicür!

Se po', per caso, j'eisi da sistemè, da ristrutturare, c'me cus dis ades, na cà ad trei pion, am racumond, c'mensè dal prüm pion, nent da l'ultim, almeno ui crola sübit tüt e... i fej pü prëstu! Antont a l'è ad moda: uardè se ch'j'on facc an Via Dante. I l'on c'mensaia da metà! Mah.. me a j'ò mai vist a fè i travaj chi c'mensu da la fen e i finisu dal prensipi! Ades, a l'è mej ca la pionta lè e per finì a voi div na bela puesia c'la scricc Sandro Locardi e che a s'antitula “A l'è Nadal...pover Bamben”:



Au di 'd Nadal u j'è nasì 'l Bamben,  
a l'è 'vnì grònd sercònda 'd fè del ben;  
i paralic ch'j'andavu nent anòn  
ui fava curi tucòndji con 'na mòn.

A l'arbrisava i sòp e sübit dòp  
in òm ch'a l'era mòrt u l'à risòrt,  
l'à dacc la vista a cui ch'i l'avu nenta  
e 'n liter 'd ven a l'è dventà 'na brenta.

I pòver diauv ch'j'andavu semp'après  
il favu sul pèr senti la so vuz,  
ma cui pü ric, geluz du so sucès,  
chic ani dòp i l'òn bitì 'ns la crus.

O car Gesù! A t'ei avnì 'ns la tèra  
pèr predichè l'amur a j'òm an guèra;  
t'aurivi ch'i dventeisu tücc amis  
e lur ricunusent... t'òn crucifis!

Pover Bamben! L'è zà dal prim Nadal  
che la to gent l'auriva fèt del mà;  
adès ch'a suma tücc ant el to mòn  
t'auruma ben... magari fin' a dmòn.

Ades av present la me famija...

